



Regulativ davart il Premi Desertina

Revisiun

M E S S A D I

dalla suprastanza communal a l cussegl da vischnaunca

Preziau signur president
Preziadas dunnas cusseglieras
Preziai signurs cussegliers

Igl onn 2002 ha la vischnaunca da Mustér creau il premi Desertina. Cun quel vul ella renconuscher engaschis particulars da vischins e vischinas sil sector dalla cultura e dil sport. Quella undraziun da prestaziun speciala ei vegnida iniziada entras in postulat da cusseglier Hans Huonder.

Ils davos onns ein adina puspei personalitads ed instituziuns vegnidas undradas. Aschia ein Victor Durschei e la Ludoteca vegni undrai igl onn 2007. Igl onn 2005 ei la distincziun da renconuschientscha vegnida surdada a pader dr. Ambros Widmer e 2006 alla Societad da musica. Il premi da promoziun han il sportist Sergio Berger e la fundaziun "Tür auf – mo vinavon" retschiert.

Il premi da reconuschientscha ei dotaus cun 3'000 francs, quel da promoziun cun 2'000 francs. Dapi ils dus davos onns ha la cumissiun desistiu da conceder quella distincziun; quei per differents motivs. La suprastanza communal ei denton dil meini da mantener quei instrument da promoziun culturala e sportiva. El rom dallas refuormas organisatoricas eis ei denton era cheu necessari d'adattar il reglament "Premi Desertina" alla nova organisaziun communal.

Igl essenzial vegn buca midaus. Da niev vegn la cumissiun eligida dalla suprastanza communal (conclus dil cussegl da vischnaunca dils 12 da december 2008 respectivamein dils 16 da schaner 2009). Conform allas refuormas instradadas vegn il text simplificaus ed ei vegn seconcentrau sil pli essenzial.

Sco tochen dacheu duei la surdada dil premi succeder en in rom festiv, p. ex. cun la seduta constitutiva dil cussegl da vischnaunca. Sco l'experientscha muossa, ei la fin dil meins da schaner il temps il pli ideal per arranschar quella fiasta.

Per l'emprema gada sutta metta la suprastanza communal in regulativ al cussegl da vischnaunca sin fundament dalla nova costituziun communal. Tenor la nova costituziun ei il cussegl da vischnaunca competent da "relaschar e midar ordinaziuns e reglaments executoris, senza vigur generala" (art. 36, alinea 1, lit. d). Cunquei ch'ei setracta buca d'in reglament da vigur generala, ei quei conclus buca da sutta metter al referendum facultativ.

Proposta

Sin fundament dallas declaraziuns precedentas

p r o p o n a

la suprastanza communal al cussegl da vischnaunca d'approbar la revisiun dil regulativ davart il Premi Desertina.

Suprastanza communal Disentis/Mustér
Il president: Il canzlist:


Dr. Dumeni Columberg


Andri Hendry

Disentis/Mustér, ils 9 da fevrer 2009

- Sboz dil regulativ